



Baeuqcaet 60 lai bi lo, lij ngoenzngoenz bae reihnaz guh hong. Gyoengq vunz ranznden raen de mboujlwnh guh yiengh hong lawz cungj fwngz saenz ga saenz caez, couh gienq de naeuz mbouj yungh guh lai lo, miz hong ce song daeglwg bae guh. Baez nyi vunz hauhneix gangj, Baeuqcaet couh diemj doengz ien ndeu “ba ba ba” ndoet hwnjdaeu, song coij raemxda youq fajnaj nyaeuqnguxngeux lae roengzdaeu.

Gangj daengz song daeglwg Baeuqcaet, baenzlawz mbouj hawj Baeuqcaet yousim ha! Gangjnaeuz Baeuqcaet daengz 35 bi cij au yah, gvaq sam bi miz song daeglwg. Vunz geq ndaej lwg, bonj dwg saeh ndei, ndigah de gyaez song daeglwg raixcaix. Byawz rox, couh dwg gyaez mauh bae, song daeglwg daj iq daeu couh mbouj guh hong, ngoenzngoenz gwn liux ninz ninz liux gwn, daengz ndaej 20 lai bi lo, lij gaenx gwn gik guh. Baeuqcaet baez siengj daengz gij saeh neix, hozndat mbouj rox daj gizlawz ok, cungj ienqhoij gaxgonq mbouj rox son lwg!

Ngoenz ndeu, Baeuqcaet raen dungxin, couh bae yihyen yawj. Canghyw genjcaz liux doiq de naeuz, baezneix dauq ranz le yienghlawz baenz gwn couh gwn, saeh lawz caengz banh couh banh lo. Baeuqcaet dingqnyi gij vah neix, ndawsim rox de mbouj miz geij nanz couh yaek dai lo. Ngoenzde, de couh bae haw cawx gvak. Youq gyanghaw, de bungz daengz nuengxbiuj de, nuengxbiuj cam de cawx gvak guh maz, de couh

lwnh gij vah canghyw hawj nuengxbiuj nyi, lij naeuz: “Cawx gvak dauq bae vat gumz, song daeglwg gik lai, lau gou dai liux mbouj miz gumz moek!” Gangj liux raemxda doeksasa. Nuengxbiuj raen de doeknaih lai, hix ndaeng soemj lo, hoeng mbouj rox baenzlawz gienq de, couh gaj gangjriu naeuz: “Gangj mbouj dingh mwngz vat gumz liux bingh couh ndei lo, daengz seizhaenx gou bang mwngz ra faex bae ndaem coq gizde, roxnaeuz gvaq geij bi song beixnuengx raeuz lij rox faenz faex bae gai ndaej ngaenz gwn laeuj bw!” Baeuqcaet rox nuengxbiuj gangj neix dwg gangj danq. Hoeng nyi daengz ndaem faex gai, Baeuqcaet faemxfwg siengj daengz maz, couh caeuq nuengxbiuj dajdingq gij saeh ndaem faex daeu.

Haemhde Baeuqcaet heuh song daeglwg daeu gangjgoj, de naeuz, seizneix miz cungj faex ndeu, rag faex rox ra gim, fanz dwg gizlawz miz gim, ndaem gij faex neix roengzbae, daengz seiz faex maj hung lo, gij rag faex gag rox geuj gij gim. Song daeglwg dingqnyi le couh mizyinx hwnjdaeu, cam daxboh au yiengh faex neix daeu ndaem. Baeuqcaet cam: “Sou siengj ndaem?” Song daeglwg mwngz yawj gou gou yawj mwngz, gvaq yaep ndeu lwglaux rag fajnaj guh raezlanglang naeuz: “Daxboh mwngz ndaem, daengz bae sou gim seiz dou caiq bae bang mwngz sou.” Baeuqcaet dingqnyi couh hoz daengjfofo, naeuz: “Sou cungj deq gou gwn, danghnaeuz gou dai bae sou baenzlawz suenq?” Song daeglwg raen daxboh hozhwnj le,

couh mbouj gangj mbouj hoed lo. Baeuqcaet cijndei ndoet ien gaemz beij gaemz hung.

Gvaq mbouj ndaej geij nanz, Baeuqcaet bingh naek lo. Ngoenz ndeu, de ing youq gwnz mbonq, cangznaek doiq song daeglwg naeuz: “Gou yaek bae raen cojcoeng sou lo, gou ciuhvunz gaenx guh hong, canh ndaej di ngaenz, vuenh baenz gim, hoeng gou lau vunz caeg bae, couh dawz bae gyangreih gyangnaz moek hwnjdaeu, seizneix gou geq lo, moek youq gizlawz gou lumz liux, daengz gou dai le, sou yaek bae ra gij gim haenx doxdau, danghnaeuz ra mbouj raen ne, sou couh ndaem gij gofaex gou gangj gvaq haenx, daengz gofaex hung le couh rox bae ra gij gim haenx lo, gij dinfaex geij ngoenz dem aubiuj sou couh rox soengq daeu.” Gangj liux couh duenhheiq lo.


Baeuqcaet oksang liux ngoenz daihsam, nuengxbiuj de couh soengq dinfaex daeu lo. Song daeglwg Baeuqcaet dawz gvak dawz canj bae vat reihnaz, byawz rox vat bae vat dauq, fanz dwg reihnaz ranz de cungj deng vat caezcienz, hoeng lij caengz vat raen gij gim daxboh gyoengqde moek. Song beixnuengx couh siengj daengz rag gofaex rox ra gim. Gauhneix, song beixnuengx couh dawz dinfaex bae ndaem coq reihnaz lo. Song beixnuengx yunghsim bae ganq gij faex ra gim.

Ngoenz rangh ngoenz bi rangh bi. haj bi gvaqbae lo, song beixnuengx raen gofaex maj hung lo, couh faenz

bae, vat gij rag okdaeu. Hoeng, cungj mbouj raen gij ragfaex geuj miz saek di gim. Song beixnuengx couh ngeiz daengz dwg mbouj dwg daxboh de yaeh gyoengqde lo. Yawj aen gang haeux, raen gij haeux daxboh ce roengzdaeu yied daeu yied noix, song beixnuengx daejngaungau hwnjdaeu.

Laeng song beixnuengx doxdaug naeuz bae ra aubiuj, aenvih gij dinfaex dwg aubiuj soengq gvaqdaeu, goulau de rox daxboh gyoengqde vihmaz yaeh gyoengqde ndaem gij faex, gangj mbouj dingh lij rox daxboh gyoengqde moek gij gim youq gizlawz dem. Gauhneix, song beixnuengx couh bae ranz aubiuj cam. Aubiuj caeuq song beixnuengx naeuz: “Boh sou caen ce gim hawj sou lo, sou yawj, sou faenz gij faex haenx, danghnaeuz dawz bae gai le, gij ngaenz canh ndaej mbouj couh dwg gim? Danghnaeuz sou gai liux youh ndaem faex moq, gvaq geij bi youh faenz bae gai canh ndaej ngaenz, ciuhvunz sou couh mbouj you lo!” Song beixnuengx daengz seizneix cij rox, daxboh gyoengqde gangj naeuz miz gim moek youq reihnaz, couh dwg yaeh de song boux bae vat reih vat naz, ndaem doenghgo, daengz baenz seiz faenz bae gai vuenh ngaenz.

Gvaqlaeng, song beixnuengx gauq ndaem faex gai faex ndwenngoenz gvaq ndaej yied daeu yied ndei. Song beixnuengx cij rox daxboh gyoengqde yunghsim son hawj song de aen dauhleix ndeu gig deng: Gaenx guh hong, couh dwg gimngaenz.



Fwjmok gyuem byaheu

Cuengq roengz soujgih le, Vangzsa gamjdaengz swheij mbouj miz maz bonjsaeh, youh riengz gyoengqvunz ndoet geij boi laeu. Caiq hai song gienh laeu, Vangzsa gaenq fiz yaek dai lo, ndwn mbouj maenh, ninz youq gwnz sah faz lo. Geij boux baengzyoux myox da, caez gwed Vangzsa cuengq youq naj bakdou suzse Siujyingz bae.

Ngoenz daihngieh mbwn loq rongh seiz, Vangzsa singi gvaqdaeu, fatyienh swheij ninz youq bakdou suzse Siujyingz, roxnyinh catsaij lo, sikhaek hwnj ndang buet deuz. Byawz rox goenglau fat saenq hwnj ndaej caeux, de yienznaeuz dava, lij raebrz dwk yawjraen Vangzsa daj bakdou suzse Siujyingz byaij roengzdaeu. “Vangzsa, mwngz caeux ha!”

·cienlanz sawcuenh·

Gij Yaemmaeuz Aicingz

爱情阴谋

□ Siz Bungzcwngz / 石鹏程

Goenglau sing hung dwk naeuz, lauheiq Vangzsa dingq mbouj ndaej nyi dem.

“Daxgoeng caeux!” Vangzsa sing daemq han, couh buet ma suzse lo.

“Seizneix bouxcoz caen vuenyungz!” Goenglau ngauz gya eu j gangj.

Ngoenzhaenx Vangzsa cingjgyaj youq ndaw rug youq.

Baezlaeng, gyoengq baengzyoux mboujguen j miz maz saeh, cungj cingj Vangzsa bae ndoet laeu, baeznaengz cungj siengj banhfap hawj Vangzsa fiz bae, couh gwed de bae daengz naj bakdou suzse Siujyingz cuengq roengz.

Gyanghaet mbouj dwg Lij daxgoeng yawjraen, couh dwg deng Cangh daxbuz bungz raen.

Mbouj geij nanz, ndaw danvih cungj rox Vangzsa gyanghaet ciengzseiz daj bakdou suzse Siujyingz byaij “okdaeu”. Bouxlawz siengj daeu caeuq Siujyingz gyau baengzyoux haenx dingqnyi aen siusik neix cungj lizhai lo. Vangzsa hix gajbienq gij mauzbingh swheij najmong lai, ra lijyouz bae caeuq Siujyingz gangjgoj, gunghcoz seiz ciengzseiz bangcoh Siujyingz.

“Doiq neix caen doxgyaez ha!” Vunz ndaw danvih cungj gangj.

Gvaq bi ndeu, gyoengqvunz sou ndaej mbaw cingjdiep Vangzsa caeuq Siujyingz doxaeu lo.

(sat)